

BN perlu bersihkan parti

Pemimpin tidak disenangi rakyat perlu dibuang jika mahu memenangi PRU15

Oleh MOHD AZLIM ZAINURY

SHAH ALAM

Barisan Nasional (BN) perlu membersihkan parti itu daripada pemimpin yang tidak disenangi rakyat terlebih dahulu jika mahu memenangi Pilihan Raya Umum ke-15 (PRU15).

Penganalisis politik dari Universiti Putra Malaysia, Dr Syed Agil Alsagoff berkata, BN harus berupaya mempersiapkan strategi politik lebih matang berteraskan kepada memperjuangkan kepentingan rakyat dan membangunkan negara.

Menurutnya, pelbagai cabaran baharu bakal dihadapi oleh mana-mana parti politik dalam negara selepas berakhirnya PRU15 khususnya bagi parti yang dipilih rakyat sebagai kerajaan dalam keadaan dunia dan negara menghadapi cabaran pasca Covid-19.

"Justeru, parti itu harus berupaya mengembalikan keyakinan dan kepercayaan rakyat terhadap kepimpinan UMNO dan BN yang disifatkan boleh menyatukan rakyat dan mendirikan keteguhan ekonomi yang terkesan teruk akibat pandemik ini."

"Dalam masa sama, parti itu perlu bersungguh-sungguh dalam memastikan kemudahan dan ke-



SYED AGIL

pentingan rakyat dalam sektor-sektor perkhidmatan kritikal seperti perubatan, pendidikan dan perdagangan dapat diperteguhkan.

"Perkhidmatan perubatan dan hospital, misalnya harus ditambah baik apa lagi sesudah menghadapi era pandemik ini, begitu juga dengan teknologi pendidikan harus diperluaskan di segenap pelosok negara bagi menyokong pendemokrasian sistem pendidikan lebih dinamik sejajar dengan aspirasi Wawasan Kemakmuran Bersama (WKB)," katanya.

Syed Agil berkata demikian ketika diminta mengulas mengenai kenyataan Presiden UMNO dan BN, Datuk Seri Dr Ahmad Zahid Hamidi yang mengatakan parti itu sudah bersedia menghadapi PRU15.

Kesediaan itu dinyatakan Ahmad Zahid selepas menerima lawatan bekas Perdana Menteri, Datuk Seri Najib Tun Razak ke kediamannya baru-baru ini.

Mengulas lanjut, Syed Agil berkata, parti itu perlu belajar daripada kesilapan silam akibat tidak cakna terhadap keperluan rakyat menghadapi isu-isu getir seperti kegawatan ekonomi, pergolakan politik, penyusutan ekonomi yang mengakibatkan kadar pengangguran rakyat yang tinggi.

Selain itu, katanya, keperluan mendesak peningkatan taraf hidup sosioekonomi rakyat yang dibelenggu dan terkesan dengan kegawatan ekonomi negara juga perlu diberikan perhatian.

"Satu hal penting ialah BN perlu menghapuskan persepsi negatif rakyat terhadap parti itu, membanteras penyelewengan rasuah, kuasa dan tidak menakluki pemikiran rakyat dengan politiking yang boleh mengganggu perpaduan atau menimbulkan persaun bias terhadap kaum.

"Mereka harus berupaya berkongsi kuasa dengan menaruh kepercayaan dan kerjasama yang erat dengan parti-parti politik yang akan mendirikan kerajaan nanti," katanya.

Kata Syed Agil lagi, parti itu perlu memberikan keprihatinan terhadap kebijakan, kesejahteraan dan kemakmuran rakyat.

Menurutnya, parti itu juga harus berupaya melonjakkan anjakan paradigma dalam budaya dan sistem politik tanah air, lahirkan suatu budaya politik baharu berteraskan kesungguhan membangun dan memajukan sistem peradaban negara ini.

Dalam masa sama, katanya, BN perlu menyisihkan politiking rakyat terutamanya generasi muda apa lagi mereka merupakan pengundi pada PRU akan datang.